



CONVENIO ENTRE A XUNTA DE GALICIA, A TRAVÉS DA CONSELLERÍA DE CULTURA, EDUCACIÓN, FORMACIÓN PROFESIONAL E UNIVERSIDADES, E A FUNDACIÓN MOP – THE MOP FOUNDATION PARA A COLABORACIÓN EDUCATIVA NAS ENSINANZAS ARTÍSTICAS PROFESIONAIS DE ARTES PLÁSTICAS E DESEÑO

Santiago de Compostela

REUNIDOS

Dunha parte, D. Román Rodríguez González, conselleiro de Cultura, Educación, Formación Profesional e Universidades, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta de Galicia e da súa presidencia, modificada pola Lei 12/2007, do 27 de xullo, de acordo co seu nomeamento polo Decreto 60/2022, do 15 de maio, e no uso das atribucións que lle confire o Decreto 119/2022, do 23 de xuño, polo que se establece a estrutura orgánica da Consellería de Cultura, Educación, Formación Profesional e Universidades (DOG do 4 de xullo).

Doutra, D. José Arnau Sierra, apoderado da Fundación MOP – The MOP Foundation, con domicilio en Cantón Grande nº 4, 15003 – A Coruña e provista de NIF G-10555431. Constituída o 5 de abril de 2022, clasificada de interese cultural por Orde da Vicepresidencia primeira e Consellería de Presidencia, Xustiza e Turismo de 6 de maio de 2022 (D.O.G. nº 94, de 16 de maio) e declarada de interese galego por Resolución da Secretaría Xeral Técnica da Consellería de Cultura, Educación, Formación Profesional e Universidades da Xunta de Galicia de 18 de maio de 2022 (D.O.G. nº 100, de 25 de maio), inscrita no Rexistro Único de Fundacións, sección da Consellería de Cultura, Educación, Formación Profesional e Universidades da Xunta de Galicia, co número 2022/6.

Ambas as partes, na representación que ostentan, recoñécense mutua capacidade para obrigarse e

EXPOÑEN

I. Que o artigo 45 da Lei orgánica 2/2006, do 3 de maio, de educación, establece que as ensinanzas artísticas terán como finalidade proporcionar ao alumnado unha formación artística de calidade e garantir a cualificación dos/das futuros/as profesionais das artes plásticas e o deseño, entre outras ensinanzas artísticas. O artigo 7.1 do Decreto 92/2015, do 11 de xuño, polo que se establece o currículo do ciclo formativo de grao superior correspondente ao título de técnico superior de Artes Plásticas e Deseño en Fotografía (DOG do 6 de xullo), indica que a persoa que obtén o título de técnico superior de Artes Plásticas e Deseño en





Fotografía pode exercer a súa profesión nos sectores produtivos no ámbito público ou privado, en empresas do sector da comunicación, axencias de publicidade, estudos de deseño, de moda, prensa, editoriais, TV, en empresas e institucións doutros sectores que así o requiran, en museos e empresas de restauración de obras de arte, arqueoloxía, laboratorios forenses, investigación policial, medicina legal, peritación, etc. Así mesmo, o artigo 7.2d) do antedito decreto indica que a persoa que obtén o título de técnico superior de Artes Plásticas e Deseño en Fotografía é un/unha profesional cualificado/a para desenvolver, entre outros, o posto de traballo e ocupación de: "Fotógrafo/a de moda. Encargos de deseñadores/as, fabricantes, distribuidores/as e revistas de moda".

II. Que a Fundación MOP é unha entidade sen ánimo de lucro que ten por obxecto o fomento e a difusión da cultura, as artes e as letras en calquera de súas manifestacións, con especial atención ás artes audiovisuais e a fotografía. En desenvolvemento deste obxecto, a Fundación poderá levar a cabo as seguintes actividades, entre outras:

- A promoción, o fomento, o desenvolvemento, a execución e o financiamento de todo tipo de actividades que coadxuven á difusión e extensión da cultura, as artes e as letras en calquera de súas manifestacións, en especial mediante a celebración de exhibicións e exposicións.
- A cooperación con calquera persoas, organizacións e institucións que destaquen pola súa contribución ao logro dos fins propios da Fundación.
- A concesión de becas, bolsas de estudo e calquera outra axuda similar, económica ou de outro tipo, para a promoción de estudos e actividades relacionados co obxecto fundacional, esencialmente en favor de persoas, organizacións e institucións con insuficiencia de medios económicos pero con dotes artísticas destacadas.

III. Que se estima fundamental a adecuación da formación dos/as fotógrafos/as ao grao de excelencia académica que esixe nas ensinanzas artísticas profesionais, e o recoñecemento e posta en valor dos méritos artísticos e académicos baseados no esforzo e no traballo do alumnado. Estes obxectivos requiren dunha activa participación e corresponsabilización de todos os axentes sociais implicados, como procedemento clave para a actualización e capacitación técnico-artística dos/das estudantes de fotografía, o que fai preciso a colaboración dos asinantes deste acordo, que permitirá afianzar o proceso de ensino-aprendizaxe nas ensinanzas artísticas profesionais de artes plásticas e deseño das escolas de arte e superiores de deseño da Comunidade Autónoma de Galicia.





En consecuencia, ambas as partes acordan subscribir o presente convenio, en base ás seguintes

CLÁUSULAS

Primeira. *Obxecto*

O obxecto do presente convenio é establecer as bases de colaboración entre a Fundación MOP e a Xunta de Galicia, a través da Consellería de Cultura, Educación, Formación Profesional e Universidades, para a realización de estadias no estranxeiro por parte de fotógrafos/as formados/as en Galicia que veñan de rematar os estudos profesionais de artes plásticas e deseño nas escolas de arte e superiores de deseño da Comunidade Autónoma de Galicia.

Segunda. *Actuacións de colaboración*

A referida colaboración levarase a cabo a través da concesión de catro bolsas ao alumnado que no curso académico de sinatura do convenio finalice o segundo curso do ciclo formativo de grao superior correspondente ao título de técnico superior de artes plásticas e deseño en Fotografía. Concederase unha bolsa por cada escola de arte e superior de deseño de Galicia.

A Fundación MOP obrígase a sufragar os custos de viaxe, aloxamento, programa educativo e manutención xerados pola estadia artística dos bolseiros na Fundación Sozzani (Milán) ao longo dos meses de outubro, novembro e decembro de 2023.

Pola súa parte, a Consellería de Cultura, Educación, Formación Profesional e Universidades comprométese a promover e organizar a convocatoria entre o alumnado do segundo curso do ciclo formativo de grao superior correspondente ao título de técnico superior en artes plásticas e deseño en fotografía das escolas de arte e superiores de deseño de Galicia, así como a organizar as reunións da comisión avaliadora na que se realizará a selección das persoas beneficiarias, de conformidade co disposto na cláusula terceira seguinte. A Dirección Xeral de Formación Profesional publicará a convocatoria no portal educativo da Consellería de Cultura, Educación, Formación Profesional e Universidades <http://www.edu.xunta.gal>.

Terceira. *Selección das persoas bolseiras e fases do procedemento*

1. Poderá concorrer o alumnado das catro escolas de arte e superiores de deseño da Comunidade Autónoma de Galicia.
2. Os requisitos para a selección das persoas bolseiras estableceranse por Resolución da Dirección Xeral de Formación Profesional pola que se fará pública a convocatoria de bolsas





para estadías no estranxeiro dirixidas ao alumnado do ciclo formativo de grao superior correspondente ao título de técnico superior de Artes Plásticas e Deseño en Fotografía das escolas de arte e superiores de deseño da Comunidade Autónoma de Galicia.

3. Seleccionaranse os tres mellores expedientes de cada escola de arte e superior de deseño tendo en conta a media aritmética das cualificacións dos módulos do 1º e do 2º curso que teñan expresión numérica, sen que se teñan en conta no dito cálculo as cualificacións de «apto», «exento» ou «validado». Non se ponderarán as notas atendendo ao número de créditos ECTS de cada módulo.

4. As persoas seleccionadas atendendo ao punto anterior deberán realizar unha entrevista, que será cualificada entre 0 e 10 puntos. Nesta entrevista valorarase o coñecemento e interese acerca da fotografía de moda. Deberá acadarse un mínimo de 5 puntos para poder resultar seleccionado/a. A cualificación desta entrevista establecerá a orde de adxudicación das bolsas.

5. Para a valoración das solicitudes, entrevista e selección das persoas candidatas, constituirase unha comisión avaliadora que estará integrada por:

a) A persoa responsable da Dirección Xeral de Formación Profesional ou persoa en quen delegue, que será o/a seu/súa presidente/a e terá voto de calidade en caso de empate.

b) Dous vogais: a persoa responsable da Subdirección Xeral de Aprendizaxe Permanente, Ensinanzas Artísticas, Idiomas e Deportivas, e un vogal da Fundación MOP ou a Fundación Sozzani.

c) Unha persoa asesora de ensinanzas artísticas da Consellería de Cultura, Educación, Formación Profesional e Universidades, que actuará como secretaria da comisión.

6. A comisión avaliadora terá atribuídas as competencias para o outorgamento das bolsas, sendo a súa decisión inapelable.

7. No caso de que nalgunha das escolas de arte e superiores de deseño non existan persoas inscritas ou non cumpran os requisitos necesarios para participar na convocatoria, a comisión avaliadora poderá declarar deserta algunha das catro bolsas ou poderá adxudicar a bolsa correspondente a ese centro educativo á persoa candidata doutra das escolas que obteña mellor cualificación na entrevista entre as persoas non seleccionadas.

8. A adxudicación das bolsas ás persoas seleccionadas será publicada no portal educativo da Consellería de Cultura, Educación, Formación Profesional e Universidades.

Cuarta Difusión do convenio

Na difusión do presente convenio deberá facerse constar a colaboración da Fundación MOP e a Consellería de Cultura, Educación, Formación Profesional e Universidades.





Na difusión destas bolsas de estadía no estranxeiro poderán intervir outras institucións que a Consellería de Cultura, Educación, Formación Profesional e Universidades ou a Fundación MOP consideren de interese para este fin. Así mesmo, poderán deseñarse accións para publicitar estas bolsas.

Sen prexuízo da normativa que resulte de aplicación, os actos relativos á información e comunicación das actuacións realizadas ao abeiro do convenio, así como os termos nos que se fará pública esta colaboración, estableceranse de mutuo acordo entre ambas partes.

Quinta. Comisión de seguimento

Establecerase unha comisión de seguimento, control e supervisión que velará polo correcto desenvolvemento do presente convenio.

Esta comisión estará constituída por:

- a) A persoa titular da Dirección Xeral de Formación Profesional ou persoa en que delegue.
- b) Dúas persoas representantes da Fundación MOP.
- c) Unha persoa funcionaria da Consellería de Cultura, Educación, Formación Profesional e Universidades, que actuará como secretaria.

Esta comisión reunirse sempre que o requira unha das partes, con previo aviso á outra parte con polo menos unha semana de antelación, e ao remate das estadías para realizar unha valoración final e a memoria correspondente. Para isto analizarase a memoria presentada por cada persoa que realizou a estadía, xa que esta detallará as actividades realizadas, e tamén o proxecto fotográfico desenvolto durante a estadía.

Sexta. Vixencia

O presente convenio terá unha vixencia ata o momento de finalización das estadías e da realización da correspondente memoria, sen prexuízo de que a vixencia poida verse estendida no suposto de que a estadía non se puidese realizar no prazo establecido inicialmente por causa de forza maior allea a calquera das partes.





Sétima. Extinción e resolución do convenio

Extinción: o convenio extínguese polo cumprimento das actuacións que constitúen o seu obxecto ou por incorreren en causa de resolución, consonte o artigo 51 da Lei 40/2015, do 1 de outubro, de réxime xurídico do sector público.

Son causas de resolución:

- a) Incumprimento das prestacións e obrigas establecidos nas cláusulas do convenio.
- b) Mutuo acordo das partes.
- c) Denuncia, expresa e cunha antelación dun mes, de calquera dos asinantes.

Oitava. Natureza do convenio

1. O presente convenio ten carácter administrativo rexéndose os seus efectos polo establecido nas cláusulas deste. No non previsto, e co fin de resolver as dúbidas e lagoas que puideran presentarse, aplicaráselle os principios recollidos na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

2. A xurisdición contencioso-administrativa será a competente para dirimir, na vía xurisdiccional, as cuestións litixiosas que puideran xurdir da aplicación do presente convenio.

Novena. Publicidade activa

De conformidade co establecido na Lei orgánica 3/2018, do 5 de decembro, de protección de datos persoais e garantía dos dereitos dixitais, ademais do resto de lexislación vixente nesta materia, ambas partes comprométense a gardar a máis estrita confidencialidade respecto de calquera das informacións, datos e documentación de carácter persoal á que teñan acceso en virtude do convenio, sen que poidan utilizalas para usos diferentes aos previstos no mesmo, e fan constar, de maneira expresa, que velarán polo cumprimento da normativa de protección de datos persoais de aplicación en cada caso. Estas obrigacións subsistirán incluso despois de finalizaren as relacións entre as partes.

Este convenio será obxecto de publicidade a través dos mecanismos establecidos para o efecto pola Xunta de Galicia, en aplicación do establecido na Lei 1/2016, do 18 de xaneiro, de transparencia e bo goberno. Así mesmo, e para garantir que non se transgreden os límites do dereito de acceso á información pública, así como dos derivados da normativa en materia de





protección de datos persoais establecidos pola normativa básica, as persoas asinantes manifestan o seu consentimento e autorización para facer pública a información relativa aos seus datos persoais e o resto de especificacións que constan no convenio, e aceptan expresamente a publicación íntegra do convenio no portal de Transparencia e Goberno aberto da Xunta de Galicia.

Lido o presente convenio, atópano conforme e asínano dixitalmente.

O conselleiro de Cultura, Educación,
Formación Profesional e Universidades

O apoderado da Fundación MOP – The
MOP Foundation

Román Rodríguez González

José Arnau Sierra

